

Eo è Tù

Eo è tù feremu un omu
Un omu novu eo è tù
Piglia terra, legnu è calcina
Apronta i to ferri dinù.

U to sangue u truveremu
U truveremu eo è tù
Chì corre in tutte le vene
Di la furiosa ghjuventù.

Di lume incenderemu u sguardu
L'incenderemu eo è tù
Da sdradicà fame è miseria
è tante è tante schjavitù.

In la so manu metteremu
Ci metteremu eo è tù
Mazzulu di fiori ribelli
Da fà cresce ogni virtù.

A so pelle a tinghjeremu
A tinghjeremu eo è tù
Di culore di mille stelle
Rossu, neru è giallu dinù.

In la so bocca pianteremu
Ci pianteremu eo è tù
U cantu di la lotta eterna
U cunniscimu eo è tù.

In lu so core piatteremu
Ci piatteremu eo è tù
Una sete di gloria à vene
Per li spluttati più ch'è più.

Nantu à la spalla li poneremu

Li poneremu eo è tù
Culomba bianca la più bella
Da cincinà e stelle quassù.

Tù chì mi senti in la bughjura
À bughju simu eo è tù
S'ellu ti piace issu mondu novu
U ci feremu eo è tù.

Tù chì mi senti in la bughjura
À bughju simu eo è tù
S'ellu ti piace issu omu novu
U ci feremu eo è tù.